

Die 7 Maii

### Inventionis S. Crucis

(Mem. facult. sed in Basilica Ssmi. Sepulcri, Festum)

*Ant. ad introitum*

cf Gal 6, 14

**N**os autem gloriári opórtet in Cruce Dómini nostri Iesu Christi in quo est salus, vita et resurrectio nostra: per quem salváti et liberáti sumus. ( *T.P.* Allelúia ).

#### *Collecta*

Deus, qui in salutíferæ Crucis Invéntióne,  
 paschále Filii tui mystérium recólere nos docuísti,  
 concéde quaésumus,  
 ut per grátiam consórtes effécti crucis,  
 partem habeámus resurrectionis et vitæ.  
 Per Dóminum.

*Quando hoc festum extra dominicam occurrit, una tantum lectio legitur ante Evangelium; extra Basilicam Ssmi. Sepulcri, semper una lectio`eligitur.*

LECTIO PRIMA ( propr. )

« *Quem cum percussi aspicerent, sanabantur* »

Lectio libri Numeri

21, 4-9

In diébus illis :

Tædere cœpit pópulum itíneris ac labóris. Locutúsque contra Deum et Móysen, ait : « Cur eduxísti nos de Aegyp-

to ut morerémur in solitúdine? Deest panis, non sunt aquæ, ánima nostra iam náuseat super cibo isto levíssimo ».

Quámobrem misit Dóminus in pópulum ignítos serpétes; ad quorum plagas et mortes plurimórum venérunt ad Móysen, atque dixerunt : « Peccávimus, quia locúti sumus contra Dóminum et te : ora ut tollat a nobis serpétes ». Oravítque Móyses pro pópulo.

Et locútus est Dóminus ad eum : « Fac serpéntem aéneum et pone eum pro signo : qui percússus aspéxerit eum vivet ». Fecit ergo Móyses serpéntem aéneum et pósuit eum pro signo; quem cum percússi aspícerent, sanabántur.

Verbum Dómini.

PSALMUS RESPONSORIUS

Ps 95, 10. 11-12. 13

*R̄.* Regnávít a ligno Deus ( *vel* Allelúia ).

- 1 Dícite in géntibus : « Dóminus regnávít ». Etenim corréxit orbem terræ qui non commovébitur; iudicábit pópulos in æquitáte. *R̄.*
- 2 Læténtur cæli et exsúltet terra, sonet mare et plenitúdo eius; Gaudébunt campi et ómnia quæ in eis sunt. Tunc exsultábunt ómnia ligna silvárum. *R̄.*
- 3 A fácie Dómini, quia venit, quóniam venit iudicáre terram. Iudicábit orbem terræ in iustítia et pópulos in veritáte sua. *R̄.*

LECTIO SECUNDA

« *Humiliavit semetipsum: propter quod et Deus exaltavit illum* »

Lectio Epistolæ beati Pauli Apóstoli ad Philippenses 2, 5-11  
Fratres:

Hoc sentite in vobis quod et in Christo Iesu: qui, cum in forma Dei esset, non rapinam arbitratus est esse se æqualem Deo, sed semetipsum exinanivit formam servi accipiens, in similitudinem hominum factus: et habitu inventus ut homo, humiliavit semetipsum factus oboediens usque ad mortem, mortem autem crucis.

Propter quod et Deus illum exaltavit et donavit illi Nomen quod est super omne nomen, ut in Nōmine Iesu omne genu flectatur cælestium et terrestrium et infernorum et omnis lingua confiteatur « Dominus Iesus Christus! », in gloriam Dei Patris.

Verbum Dómini.

ALLELUIA

R̄. Allelúia V̄. Adoramus te, Christe, et benedicimus tibi,  
quia per crucem tuam redemisti mundum.  
R̄. Allelúia.

EVANGELIUM (propr.)

« *Exaltari oportet Filium hominis* »

✠ Lēctio sancti Evangélii secúndum Ioánnem 3, 13-17

In illo témpore:

Dixit Iesus Nicodémo: Nemo ascendit in cælum, nisi qui descendit de cælo, Fílius hóminis. Et sicut Móyses exal-

tavit serpentem in desérto, ita exaltári opórtet Fílium hóminis, ut omnis qui credit in ipso hábeat vitam ætérnam ».

Sic enim diléxit Deus mundum, ut Fílium suum Unigénitum daret, ut omnis qui credit in eum non péreat sed hábeat vitam ætérnam. Non enim misit Deus Fílium in mundum ut iúdicet mundum, sed ut salvétur mundus per ipsum.

Verbum Dómini.

*Super oblata*

Súscipe, quaésumus, Dómine, munus oblátum et præsta:  
ut per virtútem sanctæ Crucis,  
ómnia nobis adversántia fórtiter superémus.

Per Christum.

*Praefatio*

V̄. Dóminus vobiscum.  
R̄. Et cum spiritu tuo.  
V̄. Sursum corda.  
R̄. Habémus ad Dóminum.  
V̄. Gratias agámus Dómino Deo nostro.  
R̄. Dignum et iustum est.

Vere dignum et iustum est, æquum et salutáre,  
nos tibi semper et ubíque grátias ágere:  
Dómine, sancte Pater, omnípotens, ætérne Deus:  
Qui salutem humáni géneris in ligno crucis constituísti,  
ut unde mors oriebátur, inde vita resúrgeret;  
et, qui in ligno vincébat, in ligno quoque vincerétur:  
per Christum Dóminum nostrum.

Per quem maiestatem tuam laudant Angeli,  
adorant Dominationes, tremunt Potestates.  
Caeli caelorumque Virtutes, ac beata Seraphim,  
socii exultatione concelibrant.  
Cum quibus et nostras voces ut admitti iubeas, deprecamur,  
supplici confessione dicentes :

Sanctus . . .

*Ant. ad communionem*

Io 12, 32

Ego si exaltatus fuero a terra, omnes traham ad me ipsum,  
dicit Dominus ( *T.P.* Alleluia ).

*Post communionem*

Repleti alimonia caelesti, quaesumus, omnipotens Deus,  
ut ab hoste maligno defendas,  
quos per Crucem Filii tui misericorditer redemisti.  
Qui vivit.